

Fastnacht 1921.



D'Batze klemmer!

(a. d. Mel.: „Crambambuli“)

Als sogenannti Dalbanese,
Sin mir in uns'rer Stadt bikannt,
Doch kemme mir hit nit in Scheese,
E jede isch jetz Musikant;
Befolgt d'rmit e b'stimmte Zweck,
D'r dörfet's glaube, 's isch kai Schleck
|: So Musik z'mache ohni Lohn
Fir d'Notstandsaktion! :|

Drum kemme mir hit zue Euch ine,
Obwohl es isch gar grislig wit,
Denn 's isch wahrhaftig fascht zum grine
Vor luter nit als Defizit;
Me ka jo luege wo me will,
Es isch halt wohr, 's isch niene z'viel,
|: Bim Staat und in d'r Dalbe n'au
Iach 's Geld so ziemlich flau! :|

Au 's Stadttheater, 's isch erbärmlich,
Trait g'wiss e grusig Loch dervo,
'S Orchester isch jetz bald hemdärmlich,
Ka nächstens no in d'Ferie go;
Do kunnt no so ne Billetstir,
'S Theater isch scho dāweg z'tir,
|: Es wird, das sage mir Eich do
D'r Boge scho biko! :|

Drum händ doch au e bitz Erbarme
Und riecht Eich uns'ri Melodie,
So denket doch an selli Arme
Vom Stadttheater au e kli,
Und helfet uns, Ihr liebe Lit,
Die klainschti Gob wird agno hit,
|: Wenn jede nur e Batze spänd't
Kenn't's länge doch am End. :|

Ihr seht, mir sin doch tapferi Manne,
Mir mache doch bi allem mit,
Und wie mir alli zämme hange
Wenn's z'decke gilt e Defizit;
D'rum wänn mir jetz au nobel si
Und lege d'r erschti Batze dri,
|: Mir sin halt doch die feinschte Lit,
D'ra z'rittle git's do nit. :|

(d'Dalbanese unter sich:)

I glaub, dä G'spass isch gar nit ohni,
Was maine Si, Herr Sarasi?
He jo, Herr Meria, säll verstohni
S'isch besser, s'kneie anderi d'ri;
Im Birger macht das nit viel us,
Ob er e Batze mehr lait d'ruf,
|: M'r müen d'rno kains vo unserem neh
Und hänn doch 's Renommée! :|

